

■ OR DA LA VITA DA LUDMILLA CAHENZLI

Ils Cahenzlis maridan muslims e muslimas

Dapi emnas èsi la medema talantiala durant tschaina. Suentar ch'ìls dus fragliuns gronds han traguttì duas pischuttas, vai liber. La gronda ed il mesaun sa stgandan pervi da muslims, minarets e fazielets. La pitschna less era dir insatge, ma ella n'ha nagina schanza da vegnir en cun il pled. Nus geniturs, Ludmilla ed Eugen Cahenzli, laschain discutir ils giuvens, lain esser tolerants e moderns.

Avant la votaziun è la discussiun ida tenor il suandant muster: il mesaun dumbra si ils menders machos dal vitg che partan gugent ora fridas. Seppi e Luca, ils dus Svizzers, lascha el sa chapescha davent e menziuna sulettamain Arment, Mensur e Mustafa. «Per da quels na stuain nus segir betg bajegiar minarets en Svizra.» Che Mensur ha ragischs serbas ed è in cristian e che Arment è in Alevit che na dovra ni moscheas ni minarets, na disturba insumma betg il mesaun.

La figlia gronda è d'in auter avis. «La Niruba, l'Isalia e la Bahrija tutgan tar mis meglras amias. Ellas èn fitg flottas e sa deportan sco nus Svizzers.»

«La Niruba n'è nagina muslima, ma bain ina Tamila», precischa il mesaun. «Ella è schon endretg, ma las muslimas cun questas burcas ed ils fazielets da chau n'han pers nagut en Svizra.»

«Cura has ti pia vesi ina dunna cun

burca en noss vitg? Ti es in rassist primitiv!»

Avant la votaziun ha la gronda gì surmaun en il cumbat retoric, ma dapi la dumengia da votaziun èsi auter. «Igl è ina vargugna da viver en quest pajais», di la gronda mintg'otra saira. Ella è londervi da zambregiar giun tschaler in minaret. Quel less ella tschentar si sco decoraziun da Nadal – illuminà cun ina massa stailas e glinas. Ma ella ha bravamain retard, uschia ch'il minaret è forsa pront sin Pasca. En mintga cas na sa lascha il figl betg pli titular sco rassist primitiv da sia sora. «Èn 57 pertschient dals Svizzers forsa rassist primitiv?», di el, sch'ella flippescha puspè ina giada ora: «Ussa stos dar tiers ch'jau hai gì raschun. Muslims na tutgan betg tar nus en Svizra. Quels duain ir a chasa, sch'i vulan crair vi da l'islam.»

«E tge fas, sch'jau marid in muslim?»

Quatter chaus sa volvan vers il chantun da la maisa, or dal qual ins n'auda uschiglio mai in'entira construcziun. La sora pitschna guarda sin ses frar e surri. Lez na sa betg tge dir.

«Sch'jau marid in muslim, lura has ti in quinà muslim e stos far padrìn d'uffants muslims», constatescha la pitschna.

L'emprima che vegn da reagir sin quest patratg è la gronda cun la bucca largia. «Classa, jau marid er in muslim e lura has la merda», di ella al frar.

«Lura stuais vus metter si fazielets ed ir a spass dus pass davos voss umens», dat el enavos. «Quai faschess bain a vus duas.»

«Na, nus maridain muslims moderns. Ti savessas gea era maridar ina muslima», fora la gronda.

«O gea», sa maschaida mes Eugen l'emprima giada en la discussiun. «Questas muslimas dals pajais arabs èn bellezza dunnas, sch'ellas prendan giu il fazielet da chau. Quai fiss schon anc insatge per tai.» Eugen tschegna cun in egl en direzziun da ses figl.

Jau, Ludmilla Cahenzli, guard cun bucca e nas sin mes Eugen. Danunder sa quel tuttenina, co che dunnas arabas vesan ora, sch'ellas prendan giu il fazielet da chau? Lura guard jau sin mes trais uffants ch'èn anc adina londervi da termagliar cun patratgs da maridar muslims e muslimas. Jau ma ves gia en diesch onns sco tatta, circumdada da pitschens biadis e pitschnas biadias – bellezza uffants senza u cun fazielets da chau. E per in batterdegl schluita ina dumonda maligna tras mes chau. Sa sch'jau avess forsa tuttina duì votar cunter ils minarets?

Il cudesch pon ins retrair online tar Lia Rumantscha www.liarumantscha.ch (http://www.liarumantscha.ch/sites/content/online_shop.html?shop:view=details&shop:productid=2830) u tar mintga libreria